

Date – 19/03/2026

Time - 18:30 -18:40Hrs

## AKASHVANI AIZAWL

### REGIONAL NEWS BULLETIN

#### HEADLINES ( EVENING )

1. Chief Minister Pu Lalduhoman inpumkhatna lama hmalakna kawngah Thangram mipuite an thawhhlawk hle a ti.
2. Aizawl Municipal Corporation inthlan neih tur atan political party ten theihtawp an chhuah chhunzawm zel.
3. BJP chuan Assam Assembly inthlan atana candidate first list 88 an tichhuak
4. President Droupadi Murmu-i chuan vawiin khan Ayodhya-a Ram Temple tlawhin Shri Ram Janmabhoomi Mandir ah a tawngtai.

<><><>

#### CM

Chief Minister Pu Lalduhoman inpumkhatna lama hmalakna kawngah Thangram mipuite an thawhhlawk hle a ti.

Vawiina Assam Ronpur-a Thangram Indigenous Peoples Movement (TPIM) leh MZP General Headquarters tangkawpin an buatsaih Thangram Cultural Meet 2026 a hmanpuinaah he thu hi sawiin Chief Minister chuan thusawiin, history ah chuan Cachar phaia khawsa hmasate chu Biate leh Hrangkhol te an ni a. Thangram pawh hi AD 1490 velah Ranglong, Sakechep, Hrangkhol, Molsom, Chorei leh Kaipeng hnamten an lo luah tawh a. British an lo lian a, an inkarah indonate a lo awm a. Vawiina Thangram ti a sawi Langkaih phai leh Singla phai mel 180 biala zau chu kum 1867 khan ramri kham fel tak neiin British leh kan pipute khan inremna an siam ta a ni a ti.

Chief Minister chuan inpumkhatna lama hmalakna kawngah Thangram mipuite an thawhhlawk hle a, Mizoram mipuite pawh an lawm hle a ni a ti a. Hnam huikhawmtu lian leh tangkai YMA te, MZP te leh kohhran te, tlawmngaipawl dangte kaltlangin nghet takin invawn tawn zel ni se a ti.

Thangram Indigenous Peoples Movement President Pu K. Vana Chorei, pawhin thusawiin, Mizoram Chief Minister meuhin a tlawh chu a ropui a, hetiang taka ram hruaitu lianin a tlawh an la hre ngai lo a ti a. An ram tana ni chhinchhiahtlak a tling a ti. Tunah chuan an chhehvela hnam dangte pawhin nu leh pa an nei a ni tih an hmuhpui ta a ti a. Mizoram mipuiten hetah an fate an awm a ni tih hrereng se a duh tih a sawi a ni.

*Thangram tih hi Khawthlang ram tihna a ni a. Mizo thlang tla hmasate luah ram niin tunah hian khaw 24 vel leh mihring singthum vel an awm mek a. Heng rama cheng zo hnahthlak hnam parukte hian Thangram Indigenous Peoples Movement dinin kawng hrang hrangin hma an la mek a ni..*

<><><>

## **MERC**

Mizoram Electricity Regulatory Commission (MZERC) huaihawtin Mizoram State Advisory Committee tum 28-na chu Aijal Club-ah vawiin khan neih a ni.

He thutkhawm hi Mizoram Electricity Regulatory Commission Chairperson Pu Benjamin L.Tlumtea chuan kaihuaiin, Power and Electricity Department-in mipuite hnena eng tha tak a pek theih dan tur te, consumer te hmakhaw ngai taka power supply chungchanga lungawi lohna rang zawka a chin felsak dan tur te ngaihtuah a ni a. AMC area leh AMC area pawn lama fel fai zawk a Street light enkawl dan tur te, Smart Metering hna thaw mek chungchang te ngaihtuah a ni a, heng bakah hian kum thara P&E Deptt.-in power supply enkawl nana revenue sum mamawh, sawrkar subsidy leh eng chhit man (tariff) hmanga hmuh let a tum dan te thlir ho a ni baw. P&E Dept.-in kum 2026-27 atana Electricity tariff hman an dilna hi Commission-in naktuk March ni 20 hian ngaihthlakna (Public Hearing) neih a ni dawn a ni.

*Naktuka Public Hearing neih turah hian Power and Electricity Department-in kum thar 2026-27 atana tariff an rawtna chungchanga Commission-in mipui atanga rawtna leh sawiselna a dawn te leh P&E Dept.-in a chhanna te ngaihthlak a ni ang.*

*State Advisory Committee hi State Electricity Regulatory Commission thurawn petu tur atana din ni in - Commerce, Industry, transport, agriculture, labour, consumer, non-governmental organizations leh electric lam kaihnawih academic and research body hrang hrang atanga mithiamte member atan ruat thin an ni.*

*MZERC Chairman Pu Benjamin L. Tlumtea chuan Power Foundation of India-in nikum 2025-a States leh Union Territory-te chet that dan Performance rating a peknaah, point 87 hmuin Mizoram Electricity Regulatory Commission chuan India ram pumah 10-na a hauh phak tih a sawi a, Grade A hmu phak state tlemte zinga Mizoram a tel ve thei chu lawmawm a tih thu a sawi baw.*

<><><>

## AMC ELECTION PREPARATION

Aizawl Municipal Corporation inthlan neih tur atan political party ten theihtawp an chhuah chhunzawm zel a.

Vawiin khan kan corr chuan Aizawla political party hrang hrangte pisa a tlawh kual a, ZPM General Secretary-a GAD changtu Pu Eddie Zosangliana Colney chuan Aizawl Municipal Corporation-a ZPM ticket a ding turte chu karleh thawhtanni March ni 23-ah puanzar a ni dawn a ni a, AMC inthlanna neih turah an inbuatsaih that bakah an party ticket-a ding turte pawh veng tin a uluk taka an thlan chhuah an nih thu a sawi a, ZPM sorkar chu tun dinhmuna an chet that avangin AMC inthlanah pawh an chet that a rin thu leh inthlan hun puan a nih hnu phei chuan ngawrh leh zual a tan lak an tum thu a sawi bawk.

Pu Eddie Zosangliana chuan ZPM-in AMC inthlan a sorkarna an siam thei a nih chuan Aizawl khawpui chu Aizawl thar “New Aizawl” ni thei tur khawp a siam an tum thu a sawi bawk.

Mizo National Front MNF Vice President leh Dampa bialtu MLA ni bawk Dr. R. Lalthangliana chuan, MNF party chuan AMC inthlan lo awm tur atan an party candidate tam zawk te chuan nikum lam atanga ngawrh taka hma an lo lak tawh thu leh sorkarna siam leh ngei tura beiseina lian tak an neih thu te a sawi a, General headquarters bakah block leh unit-ah te AMC din tu an nih ang a AMC thil tum dik tak, a dinchhan ti hlawhtling tura Aizawl mipuiten a beisei ang a sorkarna siam leh ngei tura theihtawp an chhuah tur thu a sawi.

Mizoram Pradesh Congress Committee Vice President Pu RL Vala chuan Aizawl Municipal Corporation a Congress candidate-te chu khawtlang leh kohhran a mi tangkai tak an nih thu leh bial tin chuh kim vek a sorkarna siam thei tura tan an lak tur thu a sawi a, Aizawl Municipal Corporation chu mipuite ban phak ni tura hmel thar put tir an tum thu leh sorkarna siam thei tur khawp a theihtawp an chhuah tur thu a sawi.

BJP Mizoram State General Secretary leh Mara Autonomous District Council-a MDC ni bawk Pu Delson Notlia chuan AMC inthlan lo awm tur atan manifesto committee bakah search committee-an din thu leh tum sarh lai search committee-te hi an thutkhawm bakah candidate hming thenkhat phei chu national party an nih angin central lam pawmpui tura Delhi lamah an thawn thlak thu a sawi a, AMC inthlan lo awm turah BJP candidate-te thlan tlin an nih phei chuan sorkar laipui a a fawng chelh lai an nih angin sorkar laipui chuan Aizawl khawpui tihhmasawna atan leh Aizawl khawpui harsatna sut kian nan hma an lak tur thu a sawi bawk.

*Mizoram State Election Commission chuan Aizawl Municipal Corporation inthlan vote thlak ni atan thla leh April ni 21 a ruat a, April ni 27 ah vote chhiar a ni ang.*

*Aizawl Municipal Corporation-ah hian ward 19 a awm a, heng zingah hian hmeichhiate tan a hauh bik ward hi paruk, ward no 2,4,5,11 leh 12 te a awm a, a bak ward 13 te chu candidate atana mipa leh hmeichhia nih theih ve ve na ward a ni thung a ni.*

*Aizawl Municipal Corporation innthlan hi ZPM, MNF leh Congress Party chuan ward zawnng zawnng chuh kim vek an tum a, BJP hian tun dinhmunah an ward chuh zat tur an la hre chiang rih thei lo a ni.*

<><><>

#### **AIR NEWS ON SOCIAL MEDIA**

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

#### **ASSAM ELECTION**

BJP chuan Assam Assembly inthlan atana candidate first list 88 an tichhuak a. Chief Minister Dr.Himanta Biswa Sarma chuan Jalukbari Constituency a chuh dawn a. Lok Sabha MP hlui Dr.Rajdeep Roy chuan Silchar bial a chuh dawn a. Rajya Sabha MP nilai Rameswar Teli chu Duliajan bialah a ding thung ang a. BJP State President hlui Ranjeet Kumar Dass chuan Bhowanipur-Sobhog seat a chuh dawn a, Assembly Speaker Biswajit Daimary chuan Tamulpur bial a chuh baw k ang.

Puan tawh angin Assamah hian April ni 9 ah inthlan thawhkhatna neih a ni ang.

Hetihlai hian Keralam Assembly inthlan atana an candidtate list pahnihna wawiin khan BJP chuan an ti chhuak baw k a. Candidate 39 zingah hian Keralam BJP state President hlui Kummanam Rajasekharan chuan Aranmula bial a chuh dawn a. Ashwini ML chuan Kasaragod a chuh ang a, Kongad ah Renu Suresh leh Changanassery bialah B Radhakrishna Menon te an ding ang.

<><><>

#### **PRESIDENT**

President Droupadi Murmu-i chuan wawiin khan Ayodhya-a Ram Temple tlawhin Shri Ram Janmabhoomi Mandir ah a tawngtai. Pi Murmu-i hian kg 150-a rit rangkachak Shri Ram Yantra hnenah a hlan a. He hunah hian temple sakna tura thawktu inhlawhfa, kawngsir sumdawngte leh thiamthil nei mi sang 6 chuang an tel a ni.

<><><>